



ԳՆՈՒՄՆԵՐԻ ԲՈՂՈՔԱՐԿՄԱՆ ԽՈՐՀՈՒՐԴ

ք. Երևան

30.09.2015թ.

Ո Ր Ո Շ ՈՒ Մ

ՀՀ գնումների բողոքարկման խորհրդի

ՍՑ-19/15

ՀՀ գնումների բողոքարկման խորհրդի (այսուհետ նաև՝ Խորհուրդ) քննող հանձնաժողովը՝ գործելով Խորհրդի անունից և ուսումնասիրելով ՀՀ ֆինանսների նախարարության 04.02.2014թ. թիվ 73-1/762326-15 գրությամբ ներկայացված Ա/Ձ Հովսեփի Պետրոսյանին (ՀՎՀՀ 46418546) գնումների գործընթացին մասնակցելու իրավունք չունեցող մասնակիցների ցուցակում ներառելու պաշտոնական ընթացակարգով նախաձեռնած բողոքը (այսուհետ նաև՝ ՍՑ-ԳԲԽ-19/15 բողոք), ինչպես նաև ՍՑ-ԳԲԽ-19/15 բողոքի վերաբերյալ «Գնումների աջակցման կենտրոն» ՊՈԱԿ-ի (այսուհետ նաև՝ Կենտրոն) 22.09.2015թ. ներկայացրած եզրակացությունը, պարզեց.

1. ՀՀ ֆինանսների նախարարության ներկայացրած պահանջը

ՀՀ ֆինանսների նախարարությունը 04.02.2014թ. թիվ 73-1/762326-15 գրությամբ դիմել է «Գնումների աջակցման կենտրոն» ՊՈԱԿ-ին (այսուհետ նաև՝ Կենտրոն)՝ խնդրելով ուսումնասիրել Ա/Ձ Հովսեփի Պետրոսյանին (այսուհետ նաև՝ Ա/Ձ) գնումների գործընթացին մասնակցելու իրավունք չունեցող մասնակիցների ցուցակում (այսուհետ նաև՝ Ցուցակ) ներառելու հիմքերը և այդպիսի հիմքերի առկայության դեպքում ձեռնարկել անհրաժեշտ միջոցներ Ա/Ձ-ին Ցուցակում ներառելու համար:

2. Ա/Ձ Հովսեփ Պետրոսյանի ներկայացրած փաստարկները և դիրքորոշումը

«Գնումների աջակցման կենտրոն» ՊՈԱԿ-ը, հիմք ընդունելով «Գնումների մասին» ՀՀ օրենքի 5-րդ հոդվածի 1-ին մասի 4-րդ կետի «ա» ենթակետը, կարծիք ստանալու նպատակով 10.02.2015թ. թիվ 09/032-196 գրությամբ դիմել է Ա/Ձ Հովսեփ Պետրոսյանին:

Ա/Ձ Հովսեփ Պետրոսյանը 03.03.2015թ. գրությամբ Կենտրոնին հայտնել է, որ 2014թ. հոկտեմբերի 22-ին ՀՀ պաշտպանության նախարարության և Ա/Ձ Հովսեփ Պետրոսյանի միջև կնքվել է ՇՀԱՊՁԲ-10/21-2 ծածկագրով ապրանքների (կահույքի) մատակարարման պայմանագիր (այսուհետ նաև՝ Պայմանագիր): Պայմանագրի թիվ 2 հավելվածով՝ գնման ժամանակացույցով մինչև 2014թ. դեկտեմբերի 20-ը պետք է պատրաստվեր և մատակարարվեր 3519000 ՀՀ դրամի կահույք, սակայն մատակարարվել է 827250 ՀՀ դրամի կահույք: Թերի մատակարարված կահույքի գումարային ծավալը կազմել է 2691750 ՀՀ դրամ:

Ա/Ձ-ն հայտնել է նաև, որ Պայմանագրի թերի կատարման պատճառ է հանդիսացել 2014թ. նոյեմբեր-դեկտեմբեր ամիսներին ՀՀ դրամի կտրուկ անկումը ԱՄՆ դոլարի նկատմամբ, որի հետևանքով ներքին շուկայում թռիչքային ու անկանոն տեմպերով բարձրացել է կահույքի գները:

3. ՀՀ պաշտպանության նախարարության ներկայացրած փաստարկները և դիրքորոշումը

Պատվիրատուն 29.01.2015թ. ԴՎԱ/153 գրությամբ Կենտրոնին է տրամադրել ՀՀ պաշտպանության նախարարության և Ա/Ձ Հովսեփ Պետրոսյանի միջև 22.10.2014թ. կնքված «ՇՀԱՊՁԲ-10/21-2» ծածկագրով պայմանագիրը և Պայմանագիրը միակողմանի լուծելու հիմքերը:

ՀՀ պաշտպանության նախարարությունը վերը նշված գրությամբ հայտնել է, որ հիմք ընդունելով Պայմանագրով նախատեսված գրասենյակային կահույքն Ա/Ձ Հովսեփ Պետրոսյանի կողմից մինչև Պայմանագրի գնման ժամանակացույցով նախատեսված վերջնաժամկետը (IV եռամսյակ) չմատակարարելու փաստը՝ ՀՀ 2015թ.

հունվարի 15-ին միակողմանի, չմատակարարված ապրանքների մասով, լուծել է Պայմանագիրը:

4. ՍՑ-ԳԲԽ-19/15 բողոքի վերաբերյալ «Գնումների աջակցման կենտրոն»

ՊՈԱԿ-ի դիրքորոշումը

«Գնումների աջակցման կենտրոն» ՊՈԱԿ-ը Խորհրդին է ներկայացրել իր 22.09.2015թ. եզրակացությունը և առաջարկել է ՀՀ ֆինանսների նախարարության 04.02.2014թ. թիվ 73-1/762326-15 գրությամբ Ա/Ձ Հովսեփ Պետրոսյանին գնումների գործընթացին մասնակցելու իրավունք չունեցող մասնակիցների ցուցակում ընդգրկելու պաշտոնական ընթացակարգով նախաձեռնած բողոքը բավարարել՝ Ա/Ձ Հովսեփ Պետրոսյանին (ՀՎՀՀ 46418546) ներառել գնումների գործընթացին մասնակցելու իրավունք չունեցող մասնակիցների ցուցակում՝ ՀՀ գնումների բողոքարկման խորհրդի որոշումը կայացվելու օրվանից հաշված մեկ տարվա ընթացքում Ա/Ձ-ի կողմից գնումների գործընթացին մասնակցելու հայտ ներկայացնելու դեպքում, այդ պահից հաշված երեք տարի ժամկետով:

5. ՍՑ-ԳԲԽ-19/15 պաշտոնական ընթացակարգով նախաձեռնված բողոքի քննության համար էական նշանակություն ունեցող փաստերը

ՀՀ ֆինանսների նախարարության 04.02.2014թ. թիվ 73-1/762326-15 գրությամբ Ա/Ձ Հովսեփ Պետրոսյանին գնումների գործընթացին մասնակցելու իրավունք չունեցող մասնակիցների ցուցակում ներառելու պաշտոնական ընթացակարգով նախաձեռնած բողոքի քննության համար էական նշանակություն ունեն հետևյալ փաստերը՝

1. ՀՀ պաշտպանության նախարարության և Ա/Ձ Հովսեփ Պետրոսյանի միջև 22.10.2014թ. կնքվել է «ՇՀԱՊԶԲ-10/21-2» ծածկագրով ապրանքի գնման պայմանագիր:

2. Ընթացակարգի 1-4 չափաբաժիններով նախատեսված ապրանքատեսակները (այսուհետ նաև՝ ապրանք) Պայմանագրի անբաժանելի մասը կազմող թիվ 2

հավելվածով՝ գնման ժամանակացույցով, նախատեսվել է մատակարարել 2014թ. IV եռամսյակում՝ մինչև 2014թ. դեկտեմբերի 20-ը:

3. Պայմանագրի անբաժանելի մասը կազմող թիվ 2 հավելված՝ գնման ժամանակացույցով, նախատեսված ապրանքներից Ա/Ձ Հովսեփի Պետրոսյանի կողմից չեն մատակարարվել կամ թերի են մատակարարվել մի շարք ապրանքներ, մասնավորապես՝

1) *Դարակներով պահարաններ (պահարան վաշտի ունեցվածքի անտրեստով, եռադուռ 1.35x2.5).*

Պայմանագրի թիվ 2 հավելվածով պահանջվել է մատակարարել 10 հատ դարակներով պահարան, որի միավորի գինը կազմել է 53200 ՀՀ դրամ, սակայն այդ ապրանքն ընդհանրապես չի մատակարարվել,

2) *զանազան կահույք (տակդիր ռադիոսարքավորումների).*

Պայմանագրի թիվ 2 հավելվածով պահանջվել է մատակարարել 60 հատ ռադիոսարքավորումների տակդիր, որի միավորի գինը կազմել է 14450 ՀՀ դրամ, սակայն փաստացի մատակարարվել է 40 հատ ապրանք, այսինքն՝ չի մատակարարվել 20 հատ ապրանք,

3) *բժշկական կահույք (դեղապահարան).*

Պայմանագրի թիվ 2 հավելվածով պահանջվել է մատակարարել 10 դեղապահարան, որի միավորի գինը կազմել է 27000 ՀՀ դրամ, սակայն այդ ապրանքն ընդհանրապես չի մատակարարվել,

4) *բժշկական կահույք (կողապահարան բժշկական).*

Պայմանագրի թիվ 2 հավելվածով պահանջվել է մատակարարել 100 հատ բժշկական կողապահարան, որի միավորի գինը կազմել է 18500 ՀՀ դրամ, սակայն փաստացի մատակարարվել է 33 հատ ապրանք, այսինքն՝ չի մատակարարվել 67 հատ ապրանք:

4. ՀՀ պաշտպանության նախարարությունը Ա/Ձ Հովսեփի Պետրոսյանին ուղղված 13.01.2015թ. թիվ ՊՆ 035113 գրությամբ հայտնել է, որ Պայմանագրի շրջանակներում Ա/Ձ-ի կողմից չեն մատակարարվել կամ թերի են մատակարարվել 1-4 չափաբաժիններով նախատեսված ապրանքները՝ 2691750 ՀՀ դրամի չափով:

5. ՀՀ պաշտպանության նախարարությունը 22.01.2015թ. ԴՎԱ/114 գրությամբ դիմել է Ա/Ձ Հովսեփ Պետրոսյանին և հայտնել, որ Պայմանագիրը 2015թ. հունվարի 15-ին միակողմանի լուծվել է՝ Պայմանագրի 3.1.7 կետի «բ» ենթակետի և նույն պայմանագրի 7.6 կետի հիմքով, քանի որ Ա/Ձ-ի կողմից Պայմանագրի անբաժանելի մասը կազմող գնման ժամանակացույցով նախատեսված ժամկետում՝ 2014թ. IV եռամսյակում (մինչև 2014թ. դեկտեմբերի 20-ը) չի մատակարարվել 2691750 ՀՀ դրամի գրասենյակային կահույք:

6. Պայմանագրային պարտավորությունների խախտման հետևանքով Պատվիրատուի կողմից Ա/Ձ Հովսեփ Պետրոսյանի նկատմամբ հաշվարկվել է 123821 ՀՀ դրամ՝ որպես պայմանագրով նախատեսված տույժ, 17595 ՀՀ դրամ տուգանք և տուժանք, 351900 ՀՀ դրամ՝ որպես պայմանագրի կատարման ապահովում (Պայմանագրի ընդհանուր գնի 10%), սակայն Ա/Ձ-ի կողմից այդ գումարները չեն վճարվել:

6. Խորհրդի հիմնավորումները և եզրահանգումը

Քննելով ՍՑ-ԳԲԽ-19/15 բողոքը, Խորհուրդը գտնում է, որ այն ենթակա է բավարարման հետևյալ հիմնավորմամբ.

«Գնումների մասին» ՀՀ օրենքի (այսուհետ նաև՝ Օրենք) 5-րդ հոդվածի 1-ին մասի 4-րդ կետի «ա» ենթակետի համաձայն՝ մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե հայտը ներկայացնելու պահին նախորդող տարվա ընթացքում ավելի քան մեկ անգամ խախտել է պայմանագրով նախատեսված կամ գնման գործընթացի շրջանակում ստանձնած պարտավորություն, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը:

Օրենքի 48-րդ հոդվածի 6-րդ մասի 7-րդ կետի համաձայն՝ ՀՀ գնումների բողոքարկման խորհուրդն իրավունք ունի որոշում կայացնելու մասնակցին գնումների գործընթացին մասնակցության իրավունք չունեցող մասնակիցների ցուցակում ներառելու համար:

ՀՀ կառավարության 2015թ. հունվարի 30-ի թիվ 105-Ն որոշման 7-րդ կետի համաձայն՝ մինչև նույն որոշումն ուժի մեջ մտնելն սկսված և չավարտված գնումների հետ կապված հարաբերությունները կարգավորվում են այդ գնումների գործընթացը սկսելու պահին գործող իրավական ակտերով:

ՀՀ կառավարության 10.02.2011թ. N 168-Ն որոշմամբ հաստատված «Գնումների գործընթացի կազմակերպման» կարգի (մինչև ՀՀ կառավարության 30.01.2015թ. 105-Ն որոշմամբ կատարված փոփոխությունների խմբագրությամբ) 149-րդ կետի 5-րդ ենթակետի համաձայն՝ «Գնումների մասին» ՀՀ օրենքի 5-րդ հոդվածի 2-րդ մասով նախատեսված՝ գնումների բողոքարկման խորհրդի ընդունած որոշման հիման վրա մասնակիցը գնումների գործընթացին մասնակցելու իրավունք չունեցող մասնակիցների ցուցակում ընդգրկվում է՝ 3 տարի ժամկետով, եթե ավելի քան մեկ անգամ խախտել է պայմանագրով նախատեսված կամ գնման գործընթացի շրջանակում ստանձնած պարտավորություն, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը, որի հետևանքով պատճառված վնասի, հաշվարկված տույժի կամ տուժանքի չափը գերազանցում է գնումների բազային միավորի տասնապատիկը կամ նույն կետի 1-ին, 2-րդ և 3-րդ ենթակետերով նախատեսված վնասը, հաշվարկված տույժը կամ տուժանքը չի վերականգնվել մինչև բողոքարկման խորհրդի կողմից համապատասխան որոշում ընդունվելը:

Պայմանագրի 1.1 կետի համաձայն՝ Ա/Ձ Հովսեփ Պետրոսյանը պարտավորվել է նույն պայմանագրով սահմանված կարգով, նախատեսված ծավալներով, ձևով և ժամկետներում՝ Պատվիրատուին կամ նրա կողմից որոշված ստացողին մատակարարել նույն պայմանագրի N 1 հավելվածով՝ տեխնիկական բնութագրով նախատեսված ապրանքներ, իսկ Պատվիրատուն պարտավորվել է ընդունել այդ ապրանքները և վճարել դրա համար:

Պայմանագրի 2.1 կետով սահմանվել է, որ ապրանքը մատակարարվում է Պայմանագրի N 2 հավելվածով՝ գնման ժամանակացույցով սահմանված ծավալներով և ժամկետներում:

Պայմանագրի 3.1.7 կետի համաձայն՝ ՀՀ պաշտպանության նախարարությունը իրավունք ունի միակողմանի լուծել Պայմանագիրը, եթե Ա/Ձ-ն էականորեն խախտել է Պայմանագիրը: Պայմանագիրը խախտելն էական է համարվում, եթե՝

ա) մատակարարվել է անպատշաճ որակի ապրանք, որը չի կարող փոխարինվել գնորդի համար ընդունելի ժամկետում,

բ) ապրանքի մատակարարման ժամկետները խախտվել են 15 օրից ավելի:

Այսպիսով, Խորհուրդն արձանագրում է, որ Ա/Ձ Հովսեփ Պետրոսյանն ավելի քան մեկ անգամ խախտել է Պայմանագրի թիվ 2 հավելվածով նախատեսված ապրանքի մատակարարման ժամկետները, այն է՝ թերի է մատակարարել և ընդհանրապես չի մատակարարել Պայմանագրի անբաժանելի մասը կազմող թիվ 2 հավելված՝ գնման ժամանակացույցով նախատեսված թվով 4 ապրանքատեսակներ (Ընթացակարգի 1-4-րդ չափաբաժիններով նախատեսված ապրանքներ):

Նկատի ունենալով, որ Ա/Ձ Հովսեփ Պետրոսյանի կողմից Պայմանագրով նախատեսված պարտավորություններն ավելի քան մեկ անգամ խախտվել են և վերոնշյալ խախտումները հանգեցրել են Պատվիրատուի կողմից Պայմանագրի միակողմանի լուծմանը, որի հետևանքով հաշվարկված վնասը, տույժը և տուժանքը մինչև բողոքարկման խորհրդի կողմից համապատասխան որոշում ընդունվելն Ա/Ձ-ի կողմից չի վերականգնվել, ուստի Խորհուրդը գտնում է, որ առկա են հիմքեր Ա/Ձ-ին գնումների գործընթացին մասնակցելու իրավունք չունեցող մասնակիցների ցուցակում ընդգրկելու համար:

Ելնելով վերոգրյալից և ղեկավարվելով «Գնումների մասին» ՀՀ օրենքի 48-րդ հոդվածի 6-րդ մասի 7-րդ կետով՝ ՀՀ գնումների բողոքարկման խորհուրդը

Ո Ր Ո Շ Ե Ց

ՀՀ ֆինանսների նախարարության 04.02.2014թ. թիվ 73-1/762326-15 գրությամբ Ա/Ձ Հովսեփ Պետրոսյանին գնումների գործընթացին մասնակցելու իրավունք չունեցող մասնակիցների ցուցակում ընդգրկելու պաշտոնական ընթացակարգով նախաձեռնած բողոքը բավարարել՝ Ա/Ձ Հովսեփ Պետրոսյանին (ՀՎՀՀ 46418546) ներառել գնումների գործընթացին մասնակցելու իրավունք չունեցող մասնակիցների ցուցակում՝ ՀՀ գնումների

բողոքարկման խորհրդի որոշումը կայացվելու օրվանից հաշված մեկ տարվա ընթացքում Ա/Ձ-ի կողմից գնումների գործընթացին մասնակցելու հայտ ներկայացնելու դեպքում, այդ պահից հաշված երեք տարի ժամկետով:

ՀՀ գնումների բողոքարկման խորհրդի որոշումն իրավապարտադիր է:

ՀՀ գնումների բողոքարկման խորհրդի կայացրած որոշումը կարող է բողոքարկվել դատական կարգով:

Բողոքը քննող հանձնաժողով՝

Նախագահ՝



Արման Մնացականյան

Անդամ՝



Սուսաննա Աղաջանյան